



Laschan gustar l'ensolver: Franz Sepp Caluori, Yvonne Brigger e Marc Tischhauser (da san.).



Dus purs cun corp ed olma: Gian Michael e Gian Peter Niggli (da san.).



Han procurà per il vestgi musical: Tamara Joos, Nadja Maurer e Tamara Casutt-Montalta (da san.).



Charn è in grond tema ils quatter dis da l'exposiziun.



Guardan la collecziun d'ornaments da crap grischun.



Economia e turissem: Enrico Lardelli da la direcciun da la Banca chantunala cun Martin Vincenz, il directur da Grischun Vacanzas (da san.).

FOTOS G. N. STGIER

«Oz n'è quai na pli cler»

Cuira: Avertura da l'exposiziun «Guarda»

DA GION NUTEGN STGIER / ANR

■ **Cun blera prominenz politica, da l'economia, dal turissem e da l'agricultura ha gi lieu ier l'avertura da l'exposiziun «Guarda». Sensibilisar ils visitaders per l'agricultura e l'artisanadi grischun e preschentar en ina furma autentica nossas tradiziuns e nosa cultura. Quai è er l'intent da la segunda ediziun da l'occurrèzza.** L'emprima exposiziun «Guarda», quella è stada il 2017 e cuzzà ha ella tschingt dis. Cun quella nova occurrèzza è vegnida remplazzada l'exposiziun «Ghela» ch'aveva gi blers onns ses post fix en il mais da settember. Quella è ussa definitivamain istorgia cun avrir ier l'exposiziun «Guarda» gia per la segunda giada sias portas. A l'avertura è vegnida blera prominenz, quai che tutga vitiers sche Cuira envida ad in'exposiziun. El saja fitg cuntent che l'exposiziun «Guarda» dastgia danovamain quintar cun blera bainvulientscha e simpatia, ha ditg **Marco Engel**, il directur da l'exposiziun.

Grazia als fermes partenaris sco per exempel la Banca Raiffeisen ed er auters

saja puspè stà pussaivel da realisar l'exposiziun. Quella saja cun 90 expositurs bain ina pitschna exposiziun, dentant in'occurrèzza nua che la regionalitad stettia en il focus, ha punctuà Engel. La regionalitad, quella haja adina dapli muntada, cunzunt tar la generaziun pli giuvna. Gist quella s'interesschia danunder ch'ils products vegnian, sche quels sajan autentics e correspundian er a l'ambient. Engel è persvas ch'èn l'avgnir haja la regionalitad anc dapli impurtanza en nosa societad.

Gia il num animescha

A pled è er vegnì tar l'avertura *Alessandro Della Vedova*, il president dal cussegl grond. El ha ditg che l'exposiziun «Guarda» saja gia pervia dal num autra che tut las exposiziuns ch'hajan lieu durant l'entir onn en noss chantun. «Guarda» deriva dal pled rumantsch «guardar» e dal pled talian «guardare». En il temp dad oz saja quel pled na pli uschè preschent ed oz saja quai na pli cler che nosa societad prendia temp per insumma «guardar». Er il temp da l'exposiziun «Guarda» correspundia a tut quai che vegnia preschentà

dals expositurs, saja l'atun gist la stagiun da produziun e da racolta. L'occurrèzza haja lura er in aspect social, emprendan ils producents ad enconuscher lur clients ed il cuntrari. Exposiziuns sajan er da gronda muntada per nosa societad, per la cumpagnia e per s'entupar, ha menziunà Della Vedova.

Ina buna plattforma

La quintessenza da l'exposiziun «Guarda» è er quest onn l'agricultura e l'artisanadi dal Grischun. Cun l'occurrèzza vegn inscenada ina fiera che daventa in'aventura cumpletta. Sin ina surfatscha da 10 000 meters quadrat exponan ils 90 expositurs grischuns lur products. L'exposiziun è in'entupada per vegl e giuven ed en il center stattan il deletg e la tradiziun grischuna.

En collavuraziun cun las organisaziuns «Alpinavera» e l'Uniun purila grischuna survegn cunzunt l'agricultura ina buna plattforma da sa preschentar ad in grond public. Dasper las occurrènzas culinarias cumpiglia il program er events da musica, forums ed intgins lavuratori manuals e culturals.



Na manca er betg tar l'exposiziun: Il vin grischun.